

Fas Timoti Nægkiariien sə rani mə nəfe i nəkukuə

Nəkukuə me i Pol rımərai, Fas mine Seken Timoti mine Taetas, kani mə nəkukuə me səvəi pasta me, ti nəri nə mə haməgkiari ia wok mine noien səvəi pasta me. Timoti rınətui fwe Listra. Səvənhi tata iəmə Kris, mətə səvənhi mama pran Isrel. Səvənhi mama ramahatən in ia Nəkukuə Ikinan ia nouihien səvənhi. Pol ramevən maməvisau irapw nəgkiariien amasan səvəi Kristo. Ia navəniən səvənhi sə ro kəru irə Timoti rukurirə in. In ramasitu ia Pol ia wok səvənhi. Nəpın Pol rımərai nəkukuə i, Timoti ramo wok rəmwhen ia iahatən mine iəmə asori səvəi nakalasia me fwe Efesas. Timoti in təmaruə riti, mətə ruvehi wok səvəi niriien nakalasia me. Ro pen Pol rırai nəkukuə i revən tukwe. Ia nəkukuə i Pol ramasitu irə maməvəhag min ia wok səvənhi. Pol raməvəhag min mə traməkeikei məsiari ti nahatən eikuə me mine nahatənien me səvənraha səməme həpwəh natukwatukwien. Pol rokeikei pık Timoti, ro pen ruvei pen nəvəhagien me min mə trəfo irə ti nəri nə mə in iərmama riti səvəi Kumwesən.

¹ *Iou Pol. Iou aposol riti səvəi Iesu Kristo. Kumwesən sə rauvehimıru kitaha mine Iesu Kristo sə saməmri pen əknekın nətərigien səkitaha irə irau krouni nəkwanrau mə tako.

* **1:1:** Kol 1:27

2 *Iakamrai nəkukuə i mik, Timoti. Ia nahatətəien səkrau ikəmwhen ia nərīk pərhiēn. Pwəh Tata Kumwesən mīne Iesu Kristo lərīmənu səkitaha trouəriari pehe namasanien mīne nāpiēn mīne nəmərīnuēn mik.

Timoti trīnise nahatən eikuə me

3 *Fwe kupwən, ia nəpīn iakīnamevən fwe profens Masetonia, nənə, iakīni pehe tukw ik i mə tikamarə pəpīm ia taon nəha Efesas. Nərmama nepwīn nəha ikīn hamarə irəha kamhahatən nərmama ia nəgkiariēn sə ropə ia nəgkiariēn atukwatukw. Mətə ik tikīnise irəha mə tuhəpwəh noien noien nəha. 4 *Tikīni pen tī nirəha i mə tuhəpwəh nətərig pīkiēn ia kwənagei eikuə me mīne nəgkiariēn sə rani pīk kwənəkwus me səvəi kaha kupwən me. Nəgkiariēn me nəha kamhəvi pehe a nəvisəien me. Ko həkāsitu mhə ia iərmama riti mə tro wok səvəi Kumwesən. Wok nəha nərmama səməme kamhahatətə a kamho. 5 Tikəvhag m nərmama me səkitaha mə irəha tuhaməkeikei mhokeikei irəha me. Pwəh rerīnraha rəmher. Pwəh irəha hamo a noien me səməme irəha həukurən mə ramasan. Pwəh irəha hahatətə pərhiēn ia Kumwesən. 6 Nərmama nepwīn hənəpwəh noien me i, mhənəti karen, mhəuvavən tī nəgkiariēn sə nīpwran riwən. 7 *Irəha hokeikei pīk nahatənien Loa, mətə hərəirei nīpwrai nəfe kamhəni, nəri auər a mə kamhəgkiari skai tukwe mə həukurən.

* **1:2:** Wok Me 16:1-3, Taet 1:4 * **1:3:** Fil 2:24 * **1:4:** 1Tim 4:7, Taet 1:14 * **1:7:** 1Tim 6:4,20, Taet 1:10

8 *Kitaha səukurən mə Loa in ramasan, mətə nərmama tuhaməkeikei mhahatən nərmama irə ia noien atukwatukw səvənhi. 9 Kitaha səukurən mwi mə kipkəmri mhə Loa raməmak ti nəkur atukwatukw me, mətə kəmri Loa raməmak ti nəkur kamhərui loa, mine nəkur kənkəpwənraha riskai, mine nəkur həpkahatətə mhə ia Kumwesən, mine nəkur kamho noien ərəha, mine nəkur həpko mhə nəkur ikinan me, mine nəkur həpkəmher mhə, mine nəkur kamhousi əpune tata mine mama səvənraha, mine nəkur kamhousi əpune nərmama. 10 *Kəmri Loa raməmak ti nərman mine nīpran səməme kamhəiri əpnəpen irəha me, mine nərman səməme kamhəiri atukw a irəha me, mine nərmama kamhakres iərmama mə tuhoslef irə, mine ieikuə me, mine nəkur kamheikuə ia kwopun kaməkiri nəgkiariien ikin, mine nəkur kamho noien ərəha me nepwīn mwi. Ouəh, nīpərhienien kəmri Loa raməmak ti nəkur kamho narimnari me pam nəha sə ramərarki nəgkiariien kamahatən nərmama irə sə ratukwatukw. 11 *Kumwesən in rasori mukuraan nərmama kamhəgnəgini in. Nəgkiariien atukwatukw nəha iakani raməmak ia nəgkiariien amasan səvənhi. In rīnəmri pehe nəgkiariien nəha ia rəgik, nənə iakaməvisau irəpw i.

Iesu rīnapi Pol

12 *Iesu Kristo Iərimənu səkitaha sə ramo iakiskai ti noien wok səvənhi, iakani tanak tukwe in ti nəri nə mə in rīnəkiri iou mə iakəmwhen, mətigite ia nirak, məmri iou iakamo tukwini

* 1:8: Rom 7:12,16 * 1:10: Taet 1:9 * 1:11: 1Tim 6:15

* 1:12: Wok Me 9:15, Kal 1:15-16, 1Kor 15:9-10, Kal 1:13

nari min. ¹³ Fwe kupwən, iou iərmama riti sə iakani ərəha nəghin, nənə mamometə nərmama me səvənhi, mamousi pik irəha. Mətə in rapi iou ti nəri nə mə iapkini mhə ihi nīpərhienien irə, nənə, mīreirei mə nəfe nəha iakamo. ¹⁴ Iərimənu səkitaha rətəgi irapw namasanien səvənhi ia nirak rasori pik irəhar nahatətəien mine nokeikeien sə ruku pen ti Iesu Kristo.

¹⁵ *In i nəgkiariien pərhien, nənə, kitaha pam tsaməkeikei mhəni nīpərhienien irə. Iesu Kristo rīməuvehe ia tīprənə i mə truvehimiru nərmama ərəha me. Iou iəmə iakərəha anan məpi raka pam irəha. ¹⁶ Mətə Iesu Kristo rīnapi iou mə iou iakərəha anan rəmwhen ia nīmətəien riti sə ramahatən mə nətərigien səvənhi rəpwəmwis mīpko mhə sampam ramevən ti nərmama ərəha me, pwəh nərmama nepwīn hətoni mho rəmwhen sə iakino həni nīpərhienien irə, nənə in truvei pen nimiruien rerin minraha. ¹⁷ *Kumwesən in Iərimənu rerin. In rīpkemhə mhə. Ko səpkətoni mhə. Nənə in əpa in Kumwesən. Pwəh nisaiien mine nəgnəginien krauevən tukwe in ia nuk nuk me. Ouəh, pwəh ro iamīnhi.

¹⁸ *Nəgkiariien i iakani pehe tukw ik i təkwtəkwwuni, nərik Timoti, rəmwhen a ia nəgkiariien me nəha profet me nepwīn həməni ia niram fwe kupwən. Tikuvehi nəgkiariien me i pwəh hasitu ia niram ia naruagəniien amasan sə ikamaruagən irə. ¹⁹ *Tikaməkeikei məkwtəmhiri əknekīn nahatətəien səim, məpwəh

* **1:15:** Luk 15:2, 19:10 * **1:17:** Rom 16:27 * **1:18:** 1Tim 6:12, Jut 3 * **1:19:** 1Tim 3:9

noien nari riti sə tro ik ikregi fwe ia rerim mə ikino nərəhaien. Nərmama nepwin ho noien me nepwin sə həukurən mə rərəha, nənə ia noien nəha hənouraha nahatətəien səvənraha rəmwhen ia nitətə sə rəpəruə ia nımaha. ²⁰ *Iəmə mi nəha Hameneus mine Aleksanta irau mwi nəha irəha minraha. Iou iakinəsəni raka irau mə krouəmak ia rəgi Setan pwəh krouukurən mə trouəpwəh nini ərəhaien Kumwesən.

2

Nəvəhagien me ia nikaren səvəi nəfwakiiən

¹ Nəri sə iakokeikei mə takukupwən mini ro iamınhi irə. Tikəvəhag m nərmama me səkitaha mə irəha tuhaməkeikei mhəfwaki m Kumwesən ti nərmama me pam, nənə mhəres in mə trasitu ia nirəha, muvei pen nəfe riwən ti nirəha. Nənə tuhaməkeikei mhəni mwi tanak ramevən ti Kumwesən ti nirəha. ² *Irəha tuhəfwaki ti kig me mine nərmama me pam səməme kamhəuvehi nasoriien mə kitaha tsarə ia nəməriniuen mine narəien afafa, mharə irə, mhəsiai Kumwesən, nənə mhesi pen noien atukwatukw me. ³ Noien i ramasan nənə nəpın Kumwesən səkitaha sə rauvehimiru kitaha trətoni rerin ragien. ⁴ *In rokeikei mə truvehimiru nərmama me pam, nənə mokeikei mə irəha tuhəuvehe mhəukurən nəgkiariien pərhiən səvənhi. ⁵ Kumwesən kuatia a ramarə, nənə, Iərmama kuatia a ramərer ia nımwrhenhi Kumwesən mine nərmama mavi simwin irəha. Iərmama nəha in nəha Iesu

* **1:20:** 2Tim 2:17, 2Tim 4:14, 1Kor 5:5 * **2:2:** Efes 6:18, Fil 4:6

* **2:4:** Esik 18:23, 1Tim 4:10, 2Tes 3:9, Rom 3:29-30, Hip 12:24

Kristo ⁶ *sə riməuvei pehe atukw a in ia nəpɪn atukwatukw tɪ nəɾəkuien suatuk səvəi nərmama me pam mə trifi irəha ia noien ərəha me səvənraha. Nənə ramahatən mə Kumwesən rokeikei mə truvehimiru nərmama me pam. ⁷ *Nəri in i kuvehi utə iou tukwe aposol mine iahtən səvəi nərmama rɪpko mhə irəha nəkur Isrel mə takəvisau irapw nəgkiariien amasan minraha sə raməgkiari ia nahatətəien mine nɪpərhiēnien. (Iakani pərhiēn iapkeikuə mhə.)

⁸ Ro iamɪnhi irə iakokeikei mə ia kwopun me pam nərman me tuhəuvehi utə rəgɪnraha rəmher, mo ikinan i, nənə mhəfwaki m Kumwesən. Irəha tuho iamɪnha irə mhəpwəh niemaha mine nəvisəien.

⁹ *Nənə iakokeikei mə nɪpran me tuharkahu ia tɪnari sə ratukwatukw a, rɪpko mhə tɪnari kavi nətərigien səvəi nərman irə, uə tɪnari kamarkahu i kamərpwi tukwe. Rərəha mə ho nɪmwai nukwənenraha mə tuhərpwi tukwe uə həuvehi pen marəmarə me kino ia kol mine perel me, uə harkahu tɪnari nənimen rutə pɪk. ¹⁰ *Irəha tuhaməkeikei mharkahu ia noien amasan me rəmwhen ia karkahu səvənraha, tɪ nəri nə mə in i noien atukwatukw sə nɪpran me səməme kamhəni mə irəha hokeikei Kumwesən tuho.

¹¹ Nəpɪn kamahatən nakalasia me, pwəh nɪpran me hafafa mhəpwəh nəgkiariien, mhəsiai nahatən me, mhəuvehi nukurəniēn. ¹² *Iou iapkəsəni mhə mə nɪpran tuhahatən uə hərimənu ia nərman.

* **2:6:** Kal 1:4 * **2:7:** Wok Me 9:15, Kal 2:7-8, 2Tim 1:11 * **2:9:** 1Tes 3:3-5 * **2:10:** 1Tim 5:10 * **2:12:** 1Kor 14:34

Irəha tuhaməkeikei mhafafa, ¹³ *ti nəri nə mə fwe kupwən Kumwesən rıməkupwən mo Atam kurirə ro If. ¹⁴ *Nənə rıpkə mhə Atam nə Setan rıməkupwən meikuə irə nənə ro nəkwən, mətə If rino nəkwai Setan nənə mərui nəgkiariien səvəi Kumwesən. ¹⁵ Mətə mə pran raməmwur pen ia nahatəaien, mine nokeikeiien, mine noien sə rəmher mo ikinan i, nənə in prən afafa, nəpın raməmisə ti tını mə trətui, Kumwesən trətui amasan tukwe muvehimıru in.

3

Noien səvəi elta me mine tikon me

¹ *In i nəgkiariien pərhiēn. Trini minuə iərmama riti rokeikei mə truvehe iəmə asori sə ramətui ti nakalasia me, nənə, in rinokeikei wok riti sə ramasan. ² *Iəmə asori sə rauvehi wok nəha noien səvənhi traməkeikei mo iamınhi irə. Kəpwəh nətəiēn noien ərəha riti irə. In səvənhi pran kuatia a. Rıpkə mhə in iərmama sə ramənimwi pık, mətə in nətəriēn səvənhi raməmak amasan ia nəpın me. In iərmama sə kamsiai in. In iərmama sə raməsevər ia rukwənu səvənhi ti nərmama pwıspwıs me. In iahtən amasan riti. ³ Iərmama sə ramənimwi pık uə ramousi iərmama ko rıpkuvehi mhə wok i. Mətə iərmama sə noien səvənhi ramasan məpou, rəpwəh nəvisəiēn, mıpkokeikei pık mhə mane, in rukurən nuvehiiēn wok i. ⁴ In traməkeikei miri amasan nərmama kamharə ia nəkwai nimwə səvənhi, nənə mo nıpwənətın me tuhəsiai in mho nəgkiariien səvənhi. ⁵ Trini minuə iərmama riti rıreirei niri amasanien nərmama

* **2:13:** Jen 2:7,22, 1Kor 11:8-9 * **2:14:** 2Kor 11:3 * **3:1:** Wok Me 20:28 * **3:2:** Taet 1:6-9

kamharə ia nəkwai nimwə səvənhi, nənə, trəfo miri amasan nakalasia me səvəi Kumwesən? In rīreirei noien. ⁶ Iərmama rahatətə vi a ia Iesu ripkəmwhen mhə mə truvehi wok i kamo rərpwi tukwe mīmwei pen ia nərəhaien sə Setan rino nənə Kumwesən rərpwīn noien ərəha səvənhi. ⁷ *Rəmwhen a mwi iərmama sə rauvehi wok iamīnhi nərmama me fwe iruə tuhaməkeikei mhəni amasan in kamo in rīmwei pen ia kwənkru səvəi Setan nənə kīni ərəha in.

⁸ Ia noien a mwi nəha tikon me noien səvənraha traməkeikei mo iamīnhi irə. Irəha nərmama səməme kamsiai irəha. Nəgkiariien səvənraha ripko mhə kəru. Həpkənimwi pik mhə nənīmwiien skai rəmwhen ia waen. Irəha həpkokeikei pik mhə mane. ⁹ Irəha tuhaməkeikei mhəkwtəmhiri noien səvəi nahatətəien Kumwesən rino pui pehe ia nətərigien səvənraha sə rəmher. ¹⁰ Nərmama səməme hokeikei mə tuhəuvehi wok səvəi tikon, nakalasia me tuhaməkeikei mhəkupwən mhətə amasan irəha. Trini mīnuə həpkətə mhə noien ərəha riti ia nīrəha, nənə, irəha həukurən nuvehi-ien wok nəha.

¹¹ *Ia noien a mwi nəha nīpran me səvəi tikon me^a noien səvənraha traməkeikei mo iamīnhi irə. Irəha nīpran me səməme kamsiai irəha. Ripko mhə irəha nīpran me səvəi nīniien nīkare iərmama uə nīpran me səvəi nənīmwiien, mətə irəha nīpran

* **3:7:** 2Kor 8:21 * **3:11:** Taet 2:3 a **3:11:** Suatuk riti mwi ti nuvsiniien nəgkiariien i ro iamīnhi irə. “Ia noien a mwi nəha, tikon nīpran me noien səvənraha traməkeikei mo iamīnhi irə. Irəha nīpran me səməme kamsiai irəha. Ripko mhə irəha nīpran me səvəi nīniien nīkare iərmama uə nīpran me səvəi nənīmwiien, mətə irəha nīpran səməme nərmama həukurən nətigiteien ia nīrəha ia narimnari me pam.”

me sɛmɛme nɛrmama hɔukurɛn nɛtigiteien ia nirɛha ia narimnari me pam.

12 Iɛrmama riti sɛ rauvehi wok sɛvɛi tikon tramɛkeikei miri pran kuatia a, nɛnɛ, miri amasan nɛpwnɛtin me mine nɛrmama pam kamharɛ ia nɛkwai nimwɛ sɛvɛnhi. 13 Nɛrmama sɛmɛme kamho amasan wok sɛvɛi tikon nɛghinraha tramasan irɛ, nɛnɛ, irɛha tuhɛpkehekɛr anan mhɛ mhɛgkiari ia nahatɛtɛien sɛvɛnraha sɛ ruku pen ti Iesu Kristo.

14 Tɛkwɛtɛkwuni nɛha, nɛpɛn iakamrai nɛkukuɛ i mik, rerik ramrhi mɛ tripkɔ mhɛ tui iakuvehe mɛtoni ik. 15 *Mɛtɛ trɛni minuɛ iapkuvehe akwauakw mhɛ, nɛnɛ, nɛkukuɛ i tro nukurɛnien i mik mɛ nɛfe nɛha noien ratukwatukw nɛrmama me ia nɛkwai nimwɛ sɛvɛi Kumwesɛn tuho. Nɛrmama ia nɛkwai nimwɛ nɛha kani irɛha mɛ nakalasia me sɛvɛi Kumwesɛn sɛ ramɛru, irɛha hɛmwhen ia pos asori mine nɛri skai kavvrhɛkin nimwɛ ia tɛkuren, mamhɛrhan nɛgkiariien pɛrhien. 16 *Nɛnɛ nɛpɛrhienien nɛgkiariien i kino pui pehe in nukune nahatɛtɛien sɛkitaha rani nari riti rasori, mani mɛ,

“In rimɛier pehe tukutaha nɛpwrɛn rɛmwhen ia nɛpwrataha.

Nɛnimwɛin Ikinan rahatɛn amasan mɛ in iɛmɛ atukwatukw.

Nagelo me hɛtoni in.

Kɛvisau irapw nɛgkiariien sɛvɛnhi ia tɛnɛmtɛnɛ me.

Nɛrmama me i ia tɛkure tɛprɛnɛ i hɛni nɛpɛrhienien irɛ.

Kuvehi utɛ in revɛn fwe ia neiai.”

* 3:15: Efes 2:19-22 * 3:16: Jon 1:14, Mak 16:19

4

Pol raməvəhag m Timoti

¹ *Nənimwɪn Ikinan rani irapw amasan mə tramevən ipaka ti nəpɪn sampam nənə nərmama nepwɪn tuharaka ia nahatətəien səvənraha, mhəuvən mhətərig pɪk ia nənimwɪn me səməme kamheikuə mine nəgkiariien me səməme nəremhə me kamhahatən. ² Nəgkiariien me nəha ieikuə me nepwɪn tuhəni irapw. Nətərigien səvəi ieikuə me nəha rɪnərəha anan ro pen həkregi sas mhə fwe ia rerɪnraha noien ərəha me səməme irəha kamho. ³ *Irəha tuhənise iərman ti niriiien pran, nənə, mhənise mwi irəha ti nəniien nəveginien me nepwɪn. Mətə Kumwesən rino nəveginien me nəha mə tukəni. Nənə nərmama səməme kamhəukurən nəgkiariien pərhiien, həni nɪpərhiienien irə, həukurən nuvehiiien, mhəfwaki mhəni vivi Kumwesən tukwe, mhani. ⁴ *Nəveginien me pam Kumwesən rino ramasan a. Nari riti riwən nərmama tuhəpwəh nəniien. Nərmama həukurən nəniien nəveginien me pam trini minuə həfwaki mhəni vivi Kumwesən tukwe. ⁵ Nəgkiariien səvəi Kumwesən mine nəfwakiiien iamɪnhi krauo nəveginien me pam hamasan a ti nəniien.

⁶ Trini minuə ikani irapw nəgkiariien i m piəvtaha me, ik iərmama riti sə ikamo tukwini amasan nari m Iesu Kristo. Nənə ramahatən mə ikimruə ia nəgkiariien pərhiien me səvəi nahatətəien səkitaha mine nəgkiariien amasan kamahatən nərmama irə sə ikinesi pen raka.

* **4:1:** 2Tim 3:1, 2Tes 3:3, 1Jon 2:18, Jul 18 * **4:3:** Jen 9:3, Rom 14:6, 1Kor 10:30-31 * **4:4:** Jen 1:31, Wok Me 10:15

7 *Tikəpwəh nətərigien ia kwənagei eikuə me səməme nərmama həpkisiai mhə ia Kumwesən kəmhəni. Nəpɪn me pəm tikəməkeikei mamarkut mamo noien me səməme Kumwesən rokeikei.

8 *Ikukurən trɪni mɪnuə ikamarkut mə nɪpwram trɪskai, noien nəha ramasan. Mətə trɪni mɪnuə ikamarkut nəpɪn me pəm mə tiko noien me səməme Kumwesən rokeikei, noien nəha ramasan məpi raka. Trasitu ia niram ia nɪmɪruien səvəi ipwet mɪne mɪne nɪmɪruien sə truvehe kurirə.

9 *In i nəgkiariien pərhiən nənə kɪtaha pəm tsaməkeikei mhəni nɪpərhiənien irə. 10 *Kɪtaha samarkut mamhəsese tɪ nəgkiariien i mə sənəmri pen əknekɪn raka nətərigien səkɪtaha ia Kumwesən sə ramɪru. In rauvehimɪru nərmama pəm, mətə in rauvehimɪru pərhiən irəha səməme kəmhəni nɪpərhiənien irə.

11 Tikəvəhag m nərmama mahatən narimnari me i. 12 *Pwəh nərmama tuhəpwəh nətə puilien ik tɪ nəri nə mə ik təmaruə a riti, mətə tikəmwur ia nəpɪn me mə ik iərmama riti nəkur əfwaki me həukurən nukurirəien təmwki nɪsum ia nəgkiariien, ia noien, ia nokeikeiien, ia nahatətəien, mɪne ia noien sə ratukwatukw məmher. 13 Tikəməkeikei mo wok i səvəi nəvsiniien Nəkukuə Ikinan m nərmama. Tikəvisau mahatən irəha ia nəgkiariien pərhiən. Pwəh ruvehe mo səim wok tramərəer kupwən ia nɪmɪruien səim meste takuvehe. 14 *Timoti, Kumwesən rɪməuvei pehe nasituien səvənhi mik

* 4:7: 1Tim 1:4, 6:20, 2Tim 2:16 * 4:8: 1Tim 6:6 * 4:9: 1Tim 1:15 * 4:10: 1Tim 2:3-4 * 4:12: Taet 2:15 * 4:14: 2Tim 1:6, Wok Me 6:6, 8:17

ti noien wok sǝvǝnhi. In rǝmǝuvei pehe nasituien nǝha nǝpǝn elta me sǝvǝi nǝfwakiien hǝnǝmri utǝ rǝginraha ia niram. Ia nǝpǝn nǝha profet me nepwǝn irǝha mwi hǝmǝni irapw nǝgkiariien sǝ Kumwesǝn rǝmǝni ia niram. Tikǝpwǝh nǝpwǝhien nasituien nǝha ramǝmak auǝr a.

¹⁵*Tikamǝkeikei mo narimnari me nǝha iakani. Tikamarǝ mamǝ wok me nǝha pwǝh nǝrmama pam hǝtoni nimǝruien sǝim mǝine wok sǝim rautǝ amasan. ¹⁶ Tikǝtui amasan tukw ik mǝine nǝgkiariien sǝ ikamahatǝn nǝrmama me irǝ. Nǝpǝn me pam tiko iamǝnhi irǝ. Trǝni mǝinuǝ iko, nǝnǝ, tikuvehimǝru ik mǝine nǝrmama sǝmǝme kamhǝtǝrig ik.

5

Nǝpran me nǝrman me sǝvǝnraha hemhǝ mhǝpwǝh irǝha

¹*Tikǝpwǝh nǝgkiari skaiien m nǝrgharǝ me, mǝtǝ tikǝgkiari amasan mǝnraha rǝmwhen mǝ irǝha tata me sǝim. Tikǝgkiari m ntǝmaruǝ me rǝmwhen mǝ irǝha piam me, ² mǝgkiari m nǝprǝnemǝ me rǝmwhen mǝ irǝha mama me sǝim. Tikǝgkiari m nǝpran vi me rǝmwhen mǝ irǝha kǝtirimam me. Nǝgkiariien sǝ tikǝni pen ti nirǝha i tramǝkeikei matukwatukw pam mǝmher.

³ Nǝpran me nǝrman me sǝvǝnraha hemhǝ mhǝpwǝh irǝha sǝmǝme kamharǝ ǝpa, nakalasia me tuhamǝkeikei mhasitu ia nirǝha. ⁴ Mǝtǝ mǝ nǝpwnǝti nǝpran me nǝha fwe uǝ nimwipwǝnraha me, tikahatǝn irǝha i pwǝh hǝukurǝn mǝ nǝri

* **4:15:** 1Tim 5:22 * **5:1:** Lev 19:32

sə irəha tuhəkupwəŋ mho mhəsiai Kumwesən irə, in i tuhətui amasan ti nərmmama səməme kamharə ia nəkwai nimwə me səvənraha. Noien nəha rəmwhen mə kamhərpwɪn tai nasituien m tata me səvənraha mine mama me mine kaha me. (Noien nəha ramasan ia nəmri Kumwesən mamō rerɪn ragien.) ⁵ *Mətə pran sə iərman səvənhi remhə məpwəh in əpa anan ramarə, in raməmri pen əknekin nətərigien səvənhi ia Kumwesən. Ia nəpɪn me pam ia nəpɪn mine ia ran raməfwaki m Kumwesən mə trasitu irə. ⁶ Mətə pran sə ro iamɪnhi, trɪni mɪnuə ramətərig pɪk ti narimnari me səvəi nɪpwran ti niregien ramasan irə, in ramɪru, mətə ia nənɪmwɪn rəmwhen mə ruvəmhə raka. ⁷ Tikuvei pen nəvəhəgien me i mɪnraha mə irəha tuhaməkeikei mamho. Pwəh kəpwəh nətoniien nərəhaien riti ia nɪrəha. ⁸ Iərmmama riti traməkeikei mətui amasan ti nəkur imwəni me, nənə mukupwəŋ mətui amasan ti səməme kamharə ia nəkwai nimwə səvənhi. Mətə trɪni mɪnuə rɪpko mhə, ramahatən pen mə in rɪpkahatətə pərɪhien mhə ia Kumwesən. In rərəha məpi raka iərmmama sə rɪpkahatətə mhə.

⁹ Trɪni mɪnuə pran riti səvənhi iərman remhə məpwəh in, mətə nuk səvənhi rɪpkeste mhə ihi sikisti, tikəpwəh nɪrai penien nəghɪn ia nəkukuə səvəi nasituien. Ikukurən nɪrai penien nəghɪn trɪni mɪnuə fwe kupwəŋ səvənhi iərman kuatia a, ¹⁰ *nənə nəghɪn ramasan ia noien amasan me səvənhi, rəmwhen mə rɪnətui amasan ti nɪpwɪnətɪn me mamevən meste həpwɪnari, maməsevər ia rukwənu səvənhi ti nərmmama pwɪspwɪs me, ma-

* 5:5: Luk 2:37, 18:7 * 5:10: Hip 13:2

maikuas ia nisui narmama me savai Kumwesan, mamasitu ia iavan araha me. Trini minua ramo noien amasan me pam iamihhi, ikukurən nirai penien naghin ia nakukuə naha.

11 Mətə tikəpwəh nirai penien səməme həkəprənemə mhə. Kurirə trini minua nətərigien savai nesi penien mwi iərman ruvehe miskai ia rerinraha məpi raka nətərigien savənraha ia Kristo, nənə irəha hənua tuhesi pen mwi nərman, 12 nənə tukəkiri irəha minua hənə noien araha mhərui nəgkiariien savənraha mine nəfe həməni fwe kupwən mə tuho. 13 *Nənə rərəha mwi ti nəri nə mə tuhəuvehe mho irəha rarpaha me, mhəuvən ia nimwə riti mhəier mhəuvən ia riti. Nənə tuhəpkuvehe əpa mhə mho irəha rarpaha me, mətə tuhəuvehe mwi mho irəha nīpran me kamhəni nīkare iərmama, nənə mhəpwəh noien wok, mamhəni nəgkiariien me rīpkatukwatukw mhə mə tuhəni. 14 *Ro iamihhi irə iakani pen ti nīpran me naha səməme həkəprənemə mhə mə ramasan tuhesi pen mwi nərman, mhərəhi nīpwnətīnraha me, mhətui amasan ti nərman səməme kamharə ia nəkwai nimwə me savənraha. Nənə trini minua ho iamihha irə, nənə nərman səməme haməmwəki kitaha ko həkini mhə nəgkiariien araha riti mhəuəsi kitaha irə. 15 Mətə nīpərhiēnien nīpran me nepwin hənəpwəh raka suatuk atukwatukw nənə mamhəkurirə Setan təkwtəkwni.

16 Nīpran me i səməme kamhəni nīpərhiēnien ia Iesu tuhaməkeikei mhətui amasan ti nīpran me i ia kwənəkwus savənraha səməme nərman

* 5:13: 2Tes 3:11 * 5:14: 1Kor 7:9

me sǝvǝnraha hemhǝ mhǝpwǝh irǝha. Irǝha tuhǝpwǝh naraka penien irǝha m nakalasia me mǝ tuhamǝtui amasan ti nirǝha. Nǝnǝ ro iaminihi irǝ nakalasia me tuhǝukurǝn nasituien ia ni pran me i sǝmǝme nǝrman me sǝvǝnraha hemhǝ mhǝpwǝh irǝha ǝpa anan kamharǝ.

17 *Nǝmǝ asori me sǝvǝi nǝfwakiiien sǝmǝme kamhǝiri amasan nakalasia me, nakalasia me tuhamǝkeikei mhǝsiai irǝha, nǝnǝ mhǝrǝku irǝha. Tuhǝkupwǝn mho iaminihi irǝ ia elta me sǝmǝme kamhǝsese mamhǝvisau mamhahatǝn. 18 *Iakani iaminihi irǝ ti nǝri nǝ mǝ Nǝkukuǝ Ikinan rani mǝ, “Tihǝpwǝh nǝrihi tǝriniien tǝrhui kau nǝpin rameivǝ testesi kwǝnuni wit mǝ tǝkin trier raka.” Nǝnǝ Nǝkukuǝ Ikinan rani mwi mǝ, “Iǝrmama sǝ ramowok ratukwatukw mǝ tukǝrǝku in.” 19 *Tikǝpwǝh nǝtǝrigien nǝgkiariien sǝvǝi iǝrmama kuatia a sǝ rani mǝ elta riti sǝvǝi nǝfwakiiien ramo noien ǝrǝha, mǝtǝ mǝ iǝrmama kǝru uǝ kahar kamharni, nǝnǝ, ikǝtǝrig ia sǝvǝnrakar nǝgkiariien. 20 *Nǝnǝ elta me nǝha sǝmǝme kamho noien ǝrǝha, tikiniise irǝha ia nǝmri nǝrmama pam mǝ elta me nepwini mwi tuhǝhekir noien noien ǝrǝha.

21 Ia nǝmri Kumwesǝn, Iesu Kristo, nagelo me sǝmǝme Kumwesǝn rimǝr fi raka irǝha, iakani pehe tukw ik i mǝ tikamǝkeikei mamesi pen nǝgkiariien me sǝiou ia noien sǝ ratukwatukw. Tikǝpwǝh noien noien ǝpǝ iti m iǝrmama riti, nǝnǝ, mo mwi sǝpǝ iti m iǝrmama riti mwi. Mǝtǝ tiko rǝmnǝmwhen ia nirǝha pam.

* 5:17: 1Kor 16:18 * 5:18: 1Kor 9:9, Mat 10:10 * 5:19: 2Kor 13:1 * 5:20: Kal 2:14, Efes 5:11

²² Tikəpwəh nəmri utə akwauakwien rəgim mi ia iərmama riti məfwaki pen min mə truvehi wok səvəi nəfwakiien. Trini minuə in iərmama riti səvənhi fwe ikin nərəhaien, nənə, səvənhi nərəhaien trarə ia niram rəmwhen mə ik mwi ikiməuvehi nərəhaien səvənhi. Mətə ia nəpın me pam tikəmher.

²³ (Ripkamasan mhə mə tikamənimwi a nui, mətə ramasan mə tikənimwi ouihi waen kwopti pwəh rasitu ia tıpwim mine nemhəien me sə ramo ik ia nəpın me.) ²⁴ Noien ərəha me səvəi nərmama nepwın həuvəier irapw raka, nəri auər a mə nəpın sə Kumwesən trərpwın noien ərəha irə ripkuvehe mhə ihi, mətə noien ərəha me səvəi nərmama nepwın tuhəpkier irapw kurirə. ²⁵ Rəmwhen a mwi noien amasan me səvəi nərmama nepwın həuvəier irapw raka nənə səməme kamhərkwafə ihi təkwtəkwuni, irəha mwi tuhaməkeikei mhəier irapw.

6

Slef me tuhaməkeikei mhəsiai nəmə asori me səvənraha

¹ *Pwəh slef me pam həsiai amasan nəmə asori me səvənraha kamo nərmama nepwın həni ərəha nəghi Kumwesən mine nəgkiariien səkitaha samahatən nərmama irə. ² *Slef me səməme nəmə asori me səvənraha kamhəni nıpərhiēnien ia Iesu irəha tuhəpwəh noien nəha kamhəni mə, “Eh, iəmə asori nəha in piəvtaha a riti,” nənə, irəha tuhəpkisiai amasan mhə. Mətə irəha tuhaməkeikei mho pik mwi wok ia rerınraha pərhiēn, ti nəri

* **6:1:** Efes 6:5 * **6:2:** Flm 16

nə mə səvənraha iəmə asori in iərmama riti sə rani nīpərhiēnien ia Iesu, nənə irəha hokeikei in. Tikahatən narimnari me i, mini pen ti nərmama mə tuhaməkeikei mamho.

Noien səvəi nokeikei pikien mane

³ *Trini minuə iərmama riti ramahatən nərmama, nəgkiariien səvənhi traməkeikei mesi pen nəgkiariien atukwatukw səvəi Iesu Kristo Iərimənu səkitaha mine nəgkiariien kamahatən nərmama irə sə ro ikinan i. Mə in ramahatən nəgkiariien me nəpwin ropə ia nəgkiariien nəha, ⁴ in ramərpwi in, mīpkukurən anan mhə nari. Nətərigien səvənhi ramemhə rokeikei pik nəgkiariien ti nəresien me səməme kamhəvi pehe nəmwəkiiēn mine nəvisəien. Noien nəha ro nərmama kamhəni ərəha nəghinraha me, nənə, mamhətərigə rəha ia nirəha me, ⁵* ia nəpīn me pam kamhousari. Noien nəha səvəi nərmama səməme nətərigien səvənraha rərəha. Irəha kamhəruei ia nəgkiariien pərhiēn, mamhəni mə noien nəkwai Kumwesən in suatuk riti səvəi nuvehien mane mine nautə.

⁶ *Nīpərhiēnien, trini minuə kitaha samo nəkwai Kumwesən, noien nəha trasitu asori ia kitaha, mətə tсамəkeikei mamhagien a, nəri auər a mə səkitaha nautə rouihi a uə rasori. ⁷ *Səukurən mə nəpīn sənətui pehe ia tīprənə i, nənə, mhəpkuvehi mə nari riti mhəuvehe. Nənə nəpīn tsemhə irə, ko səpkuvehi mhə mwi nari riti mhərərig. ⁸ *Mətə trini minuə sənətaha

* **6:3:** 2Tim 1:13, Kal 1:6-9 * **6:5:** 2Tim 3:8, 4:4, Taet 1:14

* **6:6:** 1Tim 4:8, Fil 4:11-12, Hip 13:5 * **6:7:** Job 1:21, Pri 5:15

* **6:8:** Prov 30:8

nəveginien mine tinari səkitaha rəmwhen a, nənə kitaha tsagien. ⁹ *Nərmama səməme hokeikei pik mə nautə səvənraha trasori, nənə riməru a ti nirəha mə tuho noien ərəha me rīpik. Rəmwhen ia kwənkru riti rəkure tərini irəha ia təpuapəg səvəi nərəhaien, nənə, irəha hokeikei mə tuho narimnari me rīpik səməme həpkamasan mhə ti nirəha mamhouraha irəha. Nənə nokeikeien səvəi narimnari ərəha me nəha trouraha nimiruien səvənraha. ¹⁰ *Iakani iamīnhi irə ti nəri nə mə noien səvəi nokeikei pikien mane in nukune noien ərəha me səpəmsəpə. Noien nəha ruvəiri raka raka nərmama nepwīn ia nahatətəien səkitaha, mo irəha ho noien me rīpik təkwtəkwni rerinraha raməmisə tukwe rəmwhen mə həpi atukw a irəha ia nau.

Pol raməvəhag m Timoti

¹¹ *Mətə ik iərmama səvəi Kumwesən tikaraka məpwəh nevəniēn ipaka ti noien ərəha me nəha. Tikamarə mamō natukwatukwien, mamō nəkwai Kumwesən, mamahatətə ia Kristo, mamō nokeikeien, mamərer əknekīn, mamō ik iəmə noien səim ramasan məpou. ¹² *Naruagəniēn amasan səvəi nahatətəien, tikaruagən irə, muvehi əknekīn nimiruiēn rerin sə Kumwesən rinəkwein ik tukwe fwe kupwən nəpīn ikiməni irapw amasan nahatətəien səim ia nəmri nərmama həpik. ¹³ *Kumwesən in nukune nimiruiēn. Iesu Kristo in iərmama sə riməni irapw amasan nəgkiariēn pərhien ia nəmri Ponjes Paelat. Ia nənimenrau

* **6:9:** Prov 23:4, 28:22 * **6:10:** Efes 5:5 * **6:11:** 2Tim 2:22

* **6:12:** 1Kor 9:25-26, 1Tim 1:18, 2Tim 4:7 * **6:13:** Jon 18:36-37,
Jon 19:11

iakani pehe tukw ik i mæ ¹⁴ tikamækeikei mo nægkiariien i kuvei pehe mik. Tiko ia suatuk sæ ræmher. Pwæh nærmama hæpwæh nætoniien næræhaien riti ia niram. Tiko iamînhi iræ mamevæn meste lærimænu sækitaha Iesu Kristo truvehhe mwi. ¹⁵ *Nuveheien sævænhi Kumwesæn tro rier pehe ia næpin atukwatukw sævænhi. In Kumwesæn sæ kamægnægini in. In æpa ramærimænu ia narimnari me pam. In Kig sæ rasori ia kig me. Nænæ in lærimænu sæ rasori ia nærimænu me. ¹⁶ *In æpa ripkemhæ mhæ mamaræ rerin ia kwopun riti rukuraan ikin, nænæ, iærmama riti ko ripkevæn mhæ ipaka. Iærmama riti ripkætoni raka mhæ in, nænæ, tipkætoni mhæ mwi. Pwæh nisaiiien mine nærimænuien sæ tripkivæn mhæ krauevæn tukwe in. Ouæh, pwæh ro iamînhi.

¹⁷ *Tikægkiari m nærmama me nautæ sævænraha rasori ia nitætæ sævæi ipwet mine, mini pen ti niræha i mæ tuhæpwæh nuvehi utæ pikien iræha, mhæpwæh næmri pen æknekiniien nætærigien sævænraha ia nautæ, nautæ sævæi tækwækwuni a mætæ trakwakwi riwæn. Iræha tuhamækeikei mhæmri pen æknekin nætærigien sævænraha ia Kumwesæn sæ rauvei pehe narimnari me ripik m kitaha mæ reritaha tragien.

¹⁸ Tikini pen ti niræha i mæ tuhamækeikei mho noien amasan. Pwæh noien amasan me næha sævænraha hasori mhæmwhen ia nautæ sævænraha. Iræha tuhamækeikei mhasitu mhæriari m nærmama. ¹⁹ *Noien næha ræmwhen mæ hænœite nautæ me ripik sæ trasitu ia niræha

* **6:15:** Dut 10:17, Rev 17:14 * **6:16:** Eks 33:20 * **6:17:** Sam 62:10, Luk 12:20 * **6:19:** Mat 6:20

kurirə. Nənə irəha həukurən nuvehiiən nimiruien i nimiruien pərhiən.

20 *Timoti, Kumwesən rinəmri pehe raka nəgkiariiən amasan səvənhi ia rəgim. Tikaməkeikei mətui amasan tukwe, məpwəh nətərigien ia nəgkiariiən auər a me səvəi tıprənə i uə nəgkiariiən me kani mə nəgkiariiən sə kauvehi nukurəniən irə, mətə rekəm neikuəiən.

21 *Nərmama nepwın kamhəkurirə ia nukurəniən nəha, nənə, mhənəpwəh nahatətəiən səvənraha.

Pwəh namasaniən tramarə tukumiaha.

* **6:20:** 1Tim 4:7, 2Tim 1:14 * **6:21:** 1Tim 1:6, 2Tim 2:18

Nəkukuə Ikinan
The New Testament in the Nafe (Kwamera) language
of Southeast Tanna, TAFEA Province, Vanuatu
Niutestamen long lanwis Nafe blong Vanuatu.
Le Nouveau Testament dans la langue Nafe de
Vanuatu.

copyright © 2013 Wycliffe Bible Translators, Inc.

Language: Nafe (Nafe)

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2019-06-18

PDF generated using Haiola and XeLaTeX on 11 Nov 2022 from source files dated 30 Nov 2021

26b0f540-c192-5878-be67-18ede9ab1416